



Na osnovu člana IV. 4. e) Ustava Bosne i Hercegovine, člana 163. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20, 53/22 i 59/23) i člana 151. Poslovnika Doma naroda Parlamentarne skupštine Bosne i Hercegovine („Službeni glasnik BiH“, br. 58/14, 88/15, 96/15 i 53/16), Predstavnički dom Parlamentarne skupštine Bosne i Hercegovine je na 12. sjednici, održanoj 31. 10. 2023, usvojio

## REZOLUCIJU

### **o potrebi donošenja odluke o otvaranju pregovora između Bosne i Hercegovine i Evropske unije o pristupanju Evropskoj uniji**

*Polazeći od činjenice da je Evropska unija 2003. godine u Solunu izrazila spremnost da sve zemlje Zapadnog Balkana primi u punopravno članstvo u Evropskoj uniji;*

*Podsjećajući da je 1. juna 2015. stupio na snagu Sporazum o stabilizaciji i pridruživanju između Evropske unije i Bosne i Hercegovine i da je Bosna i Hercegovina 15. februara 2016. godine u skladu s članom 49. Ugovora o Evropskoj uniji, podnijela zahtjev za članstvo u Evropskoj uniji;*

*Ističući da je Bosna i Hercegovina 28. februara 2018. predala odgovore na 3242 pitanja iz Upitnika Evropske komisije, te da je 4. marta 2019. predala odgovore na 655 dodatnih pitanja iz Upitnika Evropske komisije;*

*Naglašavajući da je Evropska komisija 29. maja 2019. prihvatila Mišljenje o zahtjevu Bosne i Hercegovine za članstvo u Evropskoj uniji sa 14 prioriteta;*

*Cijeneći da je Vijeće ministara Bosne i Hercegovine 15. oktobra 2019. usvojilo Akcioni plan za realizaciju prioriteta iz Analitičkog izvještaja Evropske komisije sa 729 mjera za provođenje 115 prioriteta u okviru političkog i ekonomskog kriterija, te 33 pregovaračka poglavlja;*

*Imajući u vidu da je Evropsko vijeće 15. decembra 2022. odobrilo kandidatski status za Bosnu i Hercegovinu nakon zaključka Vijeća općih poslova Evropske unije koje je usvojilo zaključak kojim se preporučuje dodjela kandidatskog statusa Bosni i Hercegovini;*

*Podcrtavajući da je članstvo u Evropskoj uniji jedno od strateških opredjeljenja Bosne i Hercegovine te da, prema posljednjim anketama, više od 70% stanovnika Bosne i Hercegovine želi članstvo u Evropskoj uniji;*

*Ubijedeni da će se ispunjavanjem kriterija za punopravno članstvo u Evropskoj uniji stvoriti bolji uslovi za sve stanovnike Bosne i Hercegovine;*

*Opredijeljeni za nedvosmisleno ostvarivanje osnovnih vrijednosti demokratije, vladavine prava, ljudskih prava i zaštite manjina, na kojima funkcioniра Evropska unija;*

*Shvatajući važnost geopolitičkog momenta u kojem se nalazimo, Predstavnički dom Parlamentarne skupštine Bosne i Hercegovine usvaja*

## REZOLUCIJU

### **o potrebi donošenja odluke o otvaranju pregovora između Bosne i Hercegovine i Evropske unije o pristupanju Evropskoj uniji**

1. Pozivamo Vijeće za opće poslove Evropske unije i Evropsku komisiju da u okviru svojih nadležnosti predlože Evropskom vijeću donošenje pozitivne odluke o otvaranju pregovora, s obzirom na globalnu geopolitičku i sigurnosnu situaciju, političke odnose u Bosni i Hercegovini i stepen usvojenih zakona i provedenih reformi u Bosni i Hercegovini nakon sticanja kandidatskog statusa.
2. Pozivamo Evropsko vijeće da donese odluku o otvaranju pregovora između Bosne i Hercegovine i Evropske unije o pristupanju Evropskoj uniji.
3. Predstavnički dom Parlamentarne skupštine Bosne i Hercegovine, Vijeće ministara Bosne i Hercegovine i sve druge institucije će kontinuirano raditi na realizaciji svih preostalih obaveza iz 14 prioriteta iz Mišljenja Evropske komisije o zahtjevu Bosne i Hercegovine za članstvo u Evropskoj uniji, te na ostalim reformama s ciljem usklađivanja propisa Bosne i Hercegovine s pravnom tečevinom Evropske unije.
4. Ova rezolucija stupa na snagu danom usvajanja i bit će objavljena u „Službenom glasniku BiH“.

Broj: 01-02-2-2276/23  
Sarajevo, 31. 10. 2023.

